



書  
五  
言  
笑



新  
舌  
曠  
城

局  
溫  
中  
成



青山詩選序

余少與伯兄鷺文學詩卽誦法漢魏盛唐雖不能至心  
向往之旣冠鄉舉硯遊四方時詩家尚小倉山一派余  
心鄙焉近二十年來時賢稍知宗尚至余通籍筮仕後  
轍迹歷三省凡屬風雅中人未肯交臂失之而吾邑自  
蔣蟄存明經姚桂林孝廉暨薌巖家兄子穀舍弟外以  
詩鳴者寥寥蓋工舉業者往往不暇及此咸豐癸丑之  
冬余避亂西山之高廬塘汪君柳坡來訪出詩草見示  
雋逸清新得風人旨余謂此吾鄉希有鳥也而汪君言  
近聯青山吟社有姚竹園諸君十數人宗旨略同聲氣

青山詩選序目

相應余渴慕良久並索其藁誦之而神馬尻輪亦遂來  
往於青山之社青山距貴池縣治七十里在南山之西  
蝦湖之東北秀起雙峰大河環抱人比之姑孰翠螺諸  
君立吟社於此以助藻思擴心胸其詩或以豪邁勝而  
鳳翥鸞翔或以幽靜勝而山高水深或以工整勝而規  
翔矩步殆如茲山平岡高阜隨地改觀也高明沈潛各  
露其資清奇濃淡各殊其態亦如茲山雪霽雨餘隨時  
異景也率皆闕淫哇掃浮曼歸於中正則雅者近是夫  
以詩人之難得也太白生盛唐之日猶曰大雅久不作  
今何磊落英多若是豈齊山浦水閒德星所聚歟抑以



提倡有人則相觀而善者眾歟以吾鄉一隅之地而羣  
雅咸集則宇宙之大才士之多阻於見聞者可勝數歟  
諸君之詩皆抑鬱不得志者之所爲窮而後工是皆然  
矣然謂詩能窮人則殊不然唐之詩人顯者有張曲江  
高達夫諸公而我

朝吳文簡沈文愨皆以詩名尊重遭際非常諸君由此  
日養其才求所以宣布文治贊揚武功者當此撥亂圖  
治之日藏器於身脫穎可出安在其終窮也哉余旣擇  
其言尤雅者合爲一編且爲誌其深幸如此咸豐甲寅  
仲冬月同里桂超萬序

青山詩選序目



青山詩選目

卷一

姚瀚

劉仁

卷二

章凌

卷三

劉含

姚穀人

汪林

卷四

姜起鈞

姚琨

卷五

青山詩選序目

三

姚潛

劉學欽

劉壩

劉崇禮

卷六

劉湘

劉瑞芬

右青山詩選六卷凡十有四人貴池劉芝田觀察暨其同社諸子所作而訂正於丹盟桂先生合為一編者也時距今二十有一年矣宗亮客滬上乃屬覆校刊行既為言曰昔歐陽公論次朋友故舊作為銘辭而於文章之行世者往往深致其概要以為託於文字可以無窮是豈結習之錮中哉竊嘗論之風雷雨雪所以鼓大化而被羣生其功用彌綸至無外矣獨有所謂景星慶雲

者於天壤非有益也而或一見之則謹然詫爲非常奇  
瑞蓋精氣之所薄而出焉非一朝夕之故也夫文之於  
人亦若是矣雖曠百世而相望猶或低徊感慕於不可  
及而況生同里閭相與結歡几席間乎貴池居江上山  
水之勝見太白詩惟久磅礴所積代有聞人至於明季  
次尾吳氏伯宗劉氏尤以文章氣節雄視海內今青山  
諸子大半往矣考其所業彬彬乎質有其文不可一言  
盡焉舉以似吳氏劉氏其高下次第知言者當能辨之  
不待蒙爲決矣觀察於當時最少其合編也以年次居  
末今舉以行世殆有感於歐陽氏之遺風乎吾知諸子  
其相慰地下也已十四人者惟姜氏籍青陽遊學貴池  
入詩選中光緒元年春三月桐城徐宗亮



青山詩選卷一

姚

瀚竹園著有  
竹園詩集

大庾嶺

五嶺障東南大庾特雄偉峻極摹蒼穹劒戟空中起想  
當秦漢交豺虎雜蛇虺雄長南越王倚之爲壁壘上有  
回雁峰雁飛不過此嗟嗟遠遊人行行何日止十月豔  
小陽寒梅破新蘂天意慰勞人香風吹不已跨嶺見南  
溟歷歷手可指楚越自此分瘴癘自此始萬山若波濤  
滾滾直趨海回首望江南一點蒼煙裏空存陟屺心不  
辨家何在自投世網中去矣復何悔

青山詩選卷一

一

彈子磯

斗絕彈子磯壁立千尋直上有斧鑿痕應是巨靈擘側  
耳聽長年高談廣明賊一彈萬夫雄片石留遺跡今我  
來南遊扁舟過其側山掩晝常陰蓬牕陡遮黑仰面驚  
心魂駭此將奔石臨下試一窺潭深不可測穴底藏龍  
鼉往往攫人食前途去彌惡一步一險絕嗟嗟遠遊人  
一行三歎息

觀音巖

挂席揚輕風得遂遊山願巖頭斂一峰巖腹劈兩片不  
識是何年早有山僧占石隙架危樓樓影波心幻我來



日光中登巖頭目眩山僧導以燈引入盤螺旋燈光瞬  
不明陰氣團人面平生氣驕矜到此自收斂騰地忽轉  
身天光透一綫直射幽暗中閃閃如曳電放步始敢前  
膜拜莊嚴殿大士像天然足踏蓮花瓣仰面窺天窗乳  
泉時下濺水鳥鳴一聲華蓋空中見

遊飛來寺至白猿洞

繫舟凝碧灣仰面飛來寺木末煙光浮雜之以雲氣金  
闕與瓊樓一一在天際目眩心魂驚頓覺非人世隨步  
入山門鳥道盤空細山陰石骨青樹古苔衣翠懸泉響  
空林灑若風雨至跌坐在巖頭指讀白猿記當年竊玉  
環本是作遊戲佳人不可攀洞門今已閉

會昌峽

纔過雩都峽旋入會昌界黑影壓篷窗船又在峽內峰  
頂白雲飛巖頭蒼煙積苦霧尤迷漫眾壑爲之蔽天難  
放晴光時常含雨意曖曖日不明冥冥晝長晦過客祝  
慈雲傑閣懸崖際空中灑飛泉珠玉隨風墜出峽人若  
醒入峽人如醉翹首望高峰山亦昏沈睡安得好風來  
送我出峽外回頭見眾山厯厯聳蒼翠

羅浮看日出

仙嶠推羅浮兩山連一脈三千六百丈高高入無極人



言大石樓中宵能看日乘夜起登攀渺無梯可陟興發  
覺身輕兩腋生羽翼飛上碧雲頭跌坐仙橋側未聞天  
雞鳴已見陽鳥出扶桑浴重輪炯炯光猶溼乍出未生  
芒對眼不能射須臾遍照耀萬道波光赤遲遲拾級下  
入谷轉昏黑十里至僧寮纔見東方白

黃岡泛海

落日隨虛舟飄然出世界混沌一氣浮始覺乾坤大但  
聞魚龍腥隱隱青蒼外平生喜遨遊茲遊平生最安得  
好奇人撫掌同稱快

蓬萊灘

青山詩選卷一

三

遠遠聞灘聲蓬萊已在望中流奔洪濤兩岸插青嶂人  
從地底來船上青天上見說此灘神使命曾能抗致祭  
必虔恭過去方無恙茲當春夏交雨後添新漲水石兩  
不降舟子各惆悵勇者欲登崖怯者先離舫有客在船  
頭談笑輕波浪

天柱灘

西江抵百粵莫難於上灘一灘一灘接有若魚升竿天  
柱居其巔灘石尤嶮岼水石兩相激舟子摧心肝一纜  
百夫挽一石千篙攢篙折纜或斷倒擲舟無完嗟我遠  
遊人生命寄波瀾在險心尚壯出險心轉酸舟已抵儲



潭魂猶落萬安

贈羊城琴僧

日脚不落地擾擾紅塵深寺外卽城市寺內卽山林中  
有羅浮僧對客揮素琴泠泠古時絃不作今時音一彈  
風色淒再彈日色沈三弄猶未畢庭木沈清陰彼自揮  
彼絃吾自豁吾襟焦枯三尺桐一片平生心彈罷澹相  
對眞道空中尋

閩灘

無諸昔創霸毅然開閩疆笑我今何爲閩灘下危檣灘  
灘連接如箕張船船相續如粃糠粃糠瓣瓣落箕內顛

青口詩選卷一

四

之簸之隨風揚心亦不能爲之主身亦不能爲之防身  
心恍惚兩無著但見驚濤澎湃摧肝腸無知小子性疎  
頑喧呼歡笑輕波瀾我今已作漢劉安全家雞犬下雲  
端

題友人雲山障子

七月八月天氣秋白雲高壓青山頭青山走入白雲裏  
松聲水聲同颼颼人云白雲行空不可留青山有主不  
可求我願假君一席地白雲爲侶山爲儔科頭赤足坐  
松下白著兩眼輕王侯醉來同君雲下臥醒來同君松  
下遊功名富貴非吾願與君盡付浮雲浮



海賊

海水洶洶海波惡海船夜傍荒山脚波平浪息風勢微  
海邊一綫潮頭落面面相窺賊喪膽擱淺船如魚落罟  
岸人急走報武營喧呼一片如雷霆大艦小艦走不停  
旌旗耀日刀槍鳴團團圍繞猶鐵城有若殺蛙排虎陳  
威逼水族蛟龍驚賊眾鼠伏皆吞聲誰知官軍自猶豫  
大言賊奴竄無路黃昏潮起賊船高乘潮鼓棹揚帆去

紫姑詞

池陽女兒十六七翠袖紅襦嬌欲滴歲歲年年接紫姑  
東家姊妹西家集紫姑轎出新奇兩竿湘竹一張箕花  
枝箕上何豔美插滿箕頭插箕尾烏紗箕上一疋多一  
半覆箕一半拖夜深更轉人初靜侍兒持燈前導引中  
有女兒性資敏自捧清茶自薦餅才向紫姑前致詞又  
代紫姑答所請堂上迎竈下送竈下迎來堂上供一步  
一步上堂階去時箕輕來較重

玉壺園看桃花歌

江城二月春正濃小桃含笑回春容嫩葉凝煙吐淨綠  
新花泣露酣嬌紅玉壺園寬無雜植千樹萬樹開無窮  
紅雲墮空香冉冉絳雪壓樹春融融花光上下相照耀  
眩轉天地迷西東池臺鋪張皆錦繡剪裁造物無餘功



狂蜂浪蝶太無賴成團結隊穿花叢花閒好鳥更快意  
飛來爲我嘯春風韶光淑氣定何物朗人眉宇開心胸  
人閒何處有此境天台玉洞將毋同風光娛人已可樂  
況與二三知已十年別一朝花下驚相逢晴栽柳坡固  
放縱曼卿少年尤英雄相將入骨愛詩酒傾人意氣衝  
長虹酒如長鯨奔大海舉頭一吸百盞空詩如駿馬下  
長坂落筆一掃千言終杯澆胸中之壘塊句響紙上之  
洪鐘詩情酒意一發不可遏狂吟爛醉輕王公丈夫未  
死誰可料我輩豈盡終蒿蓬攀花大笑出園去高呼絕  
叫驚兒童重遊桃實大如斗開園採摘提筠籠

韓湘像

青山詩選卷一

六

韓昌黎伯人中龍昂藏七尺何英雄韓清夫亦不羈者  
人世金紫難牢籠託身青山雲水窟四荒八極恣遊蹤  
三尺妖邪斬其下一瓢世界藏於中何以鳳城有遺像  
只緣昔時追隨昌黎公禦災捍患除水厄潮人尸祝酬  
神通至今歲時爭報賽萬民趨走東城東黃童白叟供  
脯酒橙黃橘綠龍蝦紅風翻靈旗日杲杲巫擊神鼓聲  
逢逢我到城根一下馬橋頭日落趨靈宮升階薦芹下  
階拜座上灑灑來仙風仰瞻雲氣繞前後燦然笑口開  
芙蓉是笑姚生殊落魄昔何豪放今龍鍾文不堪炊字



難煮便便枵腹何由充胡不從余出世外蓬萊之頂終  
南峰紫芝獻黃石青精呈赤松祇將此身一解脫天地  
同始同其終下窺塵世惛惛懵懵醉於名利不醒者得  
得失失爭雞蟲

清溪

出郭便見塔穿湖直接村人煙傍山白溪水入江渾老  
柳不遮屋扁舟都到門二生有遺廟杯酒爲招魂

蟲聲

有甚堪悲處於心總不平每當明月夜作此斷腸聲故  
國隔千里鄉思正五更淒涼眠不得歸夢定難成

青山詩選卷一

七

潮陽署中

從來抗禮地絕少放狂人有客不諧俗居常能率真短  
衣邀上客破帽度新春醉後發清興歌聲動四鄰

九日

萬里三江客千峰百粵山黃花有佳句白髮少歡顏此  
會一時盛浮生幾日閒年年作重九鴻爪落禪關

秋夜宿龍山寺

湖上龍山寺到來秋已深寒蟲弔清夜落葉響空林頓  
覺塵緣隔旋旋生物外心沈吟忘坐久斜月下危岑

孤雲



孤雲將客思并起一齊飛出岫旣多日乘風胡不歸世  
猶霖雨望汝與本心違天地亦寬闊飄飄何所依

毗陵署中望月

署外人初靜庭中夜已深一輪河漢月兩地別離心客  
夢雞聲早家書雁影沈平安只二字逆旅抵千金

夜泊京口

昨夜金陵驛今朝鐵甕城風塵游子面波浪大江聲歲  
暮客心急更深夜氣清鄰舟有鄉語側聽最關情

秋浦望月

只此一輪月常留萬古愁今來湖上望又照石城秋滿

青山詩選卷一

八

地霜初落平街水不流誰家當此夜長笛倚高樓

姑塘白泉寺

面目匡廬古波濤彭蠡寬湖山雙絕處天地一奇觀日  
落船爭泊人遊興未闌重登白泉寺高倚赤欄杆

嶺外再得家書

江南經水後市井總衰微業廢久未復書來又報飢故  
園心已碎今夜夢難歸狼籍孤燈下殘杯對影揮

題南天寺安禪房

古寺紅塵外禪房綠水閒地偏多靜境林密卽深山終  
日客不到長年僧掩關每逢棲隱處心羨野雲閒



東海看日出

斗湧一輪日高乘萬丈潮人閒還昨夜海岸又今朝山  
駭鯨鯢過萍浮島嶼遙渺然從此去一葉蓬重霄

海門蓮花峰弔文張二公

抗志辭元日捐軀報宋年頓教一拳石撐起百蠻天下  
馬我來拜如公真比肩當時臨大節易地則皆然

江行遇風

山遙欲落日江遠正行舟雨重雲烏脚風高浪白頭蒼  
黃愁怪物安穩羨浮鷗側聽船梢婦呼神呼不休

潮陽靈山寺

青山詩選卷一

九

大顛卓錫棲禪地過卻昌黎我又來浮世百年多感慨  
靈山千古幾興衰塚中遺蛻空埋鏡亭上留衣不剩灰  
天氣肅清堪四望月明人在寫經臺

九日偕柳坡登百牙山樓

風急長空曉雁哀登高難得此亭臺九華山色連天遠  
三楚江聲動地來人事怕隨梧葉老年光又放菊花開  
眼前好景休孤負故國重陽有幾回

迴瀾亭

迴瀾亭子插中流絕勝元龍百尺樓折岸河聲奔足底  
墮天峰影落城頭杯傾綠蟻人酣月帽壓黃花客詠秋



除卻登臨無一事明朝更約謝公遊

海門蓮花峰弔文信國公

信國遺蹤何處尋蓮花峰頂石磷磷一朝航海扶危主  
百計回天賴老臣生覺東南猶有宋死除張陸更無人  
前朝無限興亡淚灑向西風倍愴神

四望亭登眺

葫蘆絕頂有高臺曉日登臨四望開山勢北來峰磊落  
江聲南去水瀠洄林閒十月無紅葉石上千年有綠苔  
吹斷玉簫空對月鳳城不見鳳飛來

韓山謁文公祠

青山詩選卷一

十

狂瀾直砥中流柱正道昌明賴有君星日千秋佛骨表  
風雷一夜鱷魚文恩波自昔留潮水豪氣於今作嶺雲  
欲掃蒼苔讀遺碣恩恩回首又斜曛

濠江寄故園諸子

驚蓬一轉來天外爛醉狂吟滄海窩四面有山皆島嶼  
一年無日不風波交遊人物中原少停泊帆檣異域多  
回首江南好風景故園相望意如何

清華酒樓

萬里辭家作遠遊扁舟初到古潮州人閒寄恨惟詩卷  
天下開懷是酒樓雲裏青山當檻出雨中春水拍江流



多情不管人貽笑  
取次看花到上頭

遊潮州西湖

潮州郭外近如何  
水色嵐光畫裏過  
但得湖山似西子  
不須題品出東坡  
隄邊簫鼓游人散  
雲裏樓臺古寺多  
百丈峰頭一藜杖  
老夫豪興未消磨

登河東書院後樓

姚生落魄作雲遊  
寄跡東南天盡頭  
才愧馬周難挾策  
情同王粲慣登樓  
山銜落日峰廻影  
浦接寒潮水倒流  
憶得故園詩酒伴  
黃花籬畔正吟秋

遊平山

青山詩選卷一

十一

平山舊事不勝題  
才到山腰路便迷  
滿地落花人未掃  
連天芳草鳥空啼  
笙歌已逐浮雲散  
樓閣猶支落日西  
行客不堪惆悵處  
况逢歸思正淒淒

登粵秀山五層樓

樓高隱隱見崖門  
瘴雨蠻煙粵海濱  
萬里不堪來作客  
一身况復是依人  
囊中詩卷南荒伴  
夢裏鶯花故國春  
回首江南杳何處  
一番悵望一傷神

滴翠巖

巉巖闢洪荒  
雲木亦太古  
空濛翠欲流  
半壁飛晴雨

春去



春來花芬芳春去花蕭索莫自怨東風無風花亦落

鶯花

百粵鶯花一路新馬蹏踏去起香塵遊人不惜春將盡  
歸到江南尚是春

過處士山莊

瀟灑林泉處士家柴門深鎖古煙霞客來樹密陰濃處  
一種清香不是花

紅棉寺看木棉花

丹荔紅蕉漫並衡三春開遍五羊城遊人正惜花無語  
飛起鷓鴣嘯一聲

青山詩選卷一

十一

喜友人至

牀頭新釀酒初熟籬落舊栽花更開正欲傳杯邀客賞  
兒童爭報故人來

贈海陵故人

只今猶共客天涯夢裏鄉關道路賒莫上高樓望桃李  
春來都是斷腸花

秋桑

十畝桑陰一旦收霜風頓起陌頭秋行人莫漫悲搖落  
桑女而今亦白頭

牡丹

春來牡丹春去牡丹蕭索莫自怨東風無風牡丹亦落



纔報春花發牡丹看花車馬滿長安未開時與開殘後  
從不逢人著眼看

廣州白雲山瀑布

白雲山上白雲泉噴玉跳珠落九天誰把水晶簾一幅  
古今長挂洞門前

南山滴翠巖

萬重巖翠頻頻滴滴溼淵明漉酒巾今日品題殊易事  
好詩吟殺後來人

劉

仁晴峩著有綠雲軒詩集

古風

青山詩選卷一

三

深山愛窮僻草木無古今眾鳥弄長歌流水理鳴琴好  
友時時來談笑意何深不知塵世外乃有利名心羨彼  
桃源人清流滌煩襟桑盛綠繞屋果熟紅滿林俯仰遊  
太虛迥然發孤吟

野鳥遠飛來倏然入林側胡爲聲喞喞歸貽老烏食食  
罷猶自飛來去無休息微禽尚如斯含悲空默默

矯矯松樹枝卓立孤峰上柯節四時榮材幹千人望大  
厦久相需惆悵勞哲匠豎立千百年斤削誰詢訪迢迢  
天梯遙壘纍頑石抗開山斧未成五丁聲悲壯

締交有窮士寄情典與墳衣履常不完清貧無與倫越



日一來過相對忘話言清泉煮石鼎濁酒開芳樽年華  
瞬息閒來去流電奔胡不辨榮枯竟自樂朝昏願與訂  
河岳意氣常相存

豫讓死智伯荆卿死燕丹功業雖未成其心良獨難吞  
炭不言苦渡水不知寒生氣凜千載大義昭兩閒世豈  
無其人蒹葭水漫漫

遊仙詩

卯角契方術採藥遍丹邱道書千萬卷卷卷撮其尤蘭  
膏燒幾許時忘秉燭遊扶桑朝日升猶認月華流積累  
廿餘年蛻昇庶可求蓬萊幾萬里躡足涼風秋還坐丹

青山詩選卷一

十四

竈旁寥寥罕匹儔

縱目蕊珠宮宮中多綺羅仙樂試霓裳鑿我舞婆娑已  
掣上侶籌乘槎涉風波天書陡然降仙籍如爾何道匪  
赤松傳臨駕豈謬訛

漢武癖神仙垂死志方倦桂觀通天台相沿惟一綫唐  
宗服其藥火毒驚傳變仙可有意求方壺渺難見曾向  
天門下兩度侍遊宴不睹果老翁猶然目空眩深憩古  
洞中金丹重煅鍊

箕踞長松下馥馥青芝香塵尾揮落葉大聲歌滄浪李  
耳青牛閒陳搏蹇驢忙含華詣當路故故露其芒何如



浮邱生屏迹謝滄桑丹竈水火勻大塊乏短長

春日田閒作

有食萬事足無食百慮生所以陶淵明努力事躬耕幽泉激石響好鳥穿林鳴行行適所願良苗縱復橫膏雨潤芳甸惠風吹輕程守此勿復易聊以寄吾情

原上作

潔柔上高原涕泗流涓涓少隨先人往丁寔意纏緜白楊蕭疎中纍纍皆墓田碑碣汝須記一一拜筮前悲風颯然發乾蔭庭前失祇此一樽酒焉能九泉達翹翹松柏林枝高雲影沈嚴冬衛風雪長夏垂清陰依傍我原

《青山詩選卷一

五

野青青長古今人生不如物何以表寸心

擬古

黍麥隴上黃桑柘檐前綠寂處胡寥寥家無隔夜粟妻子解安貧簞瓢願莫足此事當語誰窮途志彌篤月出東南隅清歌動隣曲

秋暮與柳坡石村北窗芝田偶集竹軒別後寄懷  
良朋挈好懷牽裾集茅屋穠綠漾前楹蕭然豁遊目愧乏濁酒樽蕩鼎煮巖瀑持我夙所懷一一咨疑牘傾談未盡歡陽烏墮寒谷高足躡平原晚煙黯林麓翹首睇短檐相思結幽獨



短歌行

素絲織成綺裁爲老萊服終日舞帷下盤匱乏粒穀隣  
里羣眼白傲骨難屈伏肝腸已裂帛閨闈謫餽粥四顧  
煙雲漫何處尋合粟躡足猶遲遲皓質敢垢辱天道胡  
茫茫有途皆局促轉展無奈何忍墮崑山玉感此傷我  
心泣涕零中曲

冬夜懷友

林木勁寒飈窗竹蕩素月獨坐默無言澗水流汨汨遠  
聆空外音蕭蕭徹瘦骨轉側動遙情寒梅幾枝馥

梁甫吟

青山詩選卷一

十六

泰山峩峩兮道里攸長身不能飛兮虎豹成行縱目遠  
望兮雲屯高岡神恍惚兮涕沾裳心憂鬱而抑塞兮嗟  
大樹之隕亡懷寶玉兮何所匡騏驥空韁兮駑駘騰驤  
洞猶婀娜兮蘭茝不芳流蘇寂兮長夜涼朔風怒號兮  
天降霜輾轉反側兮懷感傷中情莫致兮魂飛揚美人  
不來兮吾何望

臥鐘歌

宅南翠螺山下有潭百尺漁人常下罟焉深處  
有物半欹半臥不知何物數往知爲巨鐘爲泥  
沙所掩余聞其異作歌誌之



翠螺山下潭百尺古木杈柯列矛戟漁人網罟出洪濤  
中有巨鐘墮入鯨鯢之深宅穿流誤撞聲琅琅元音鏗  
鞞水中央側身逡巡細摸索恂惚翻如鼉鼉翔驚濤駭  
浪色難辨傍鉉髯凝古篆醜慘遍裹綠苔紋似煙非  
煙雲非雲澄潭蕩漾不見底波光日光相氤氳聞言輒  
轉長歎息扇畫無方挽無力風澄波定爲潛窺得識青  
蒼古顏色爾胡不置景陽宮銅龍漏盡聲隆隆黝黑如  
雲列西東號令三十六宮何其雄又不貢之縣太廟笙  
鼗祝啟權眾妙尊爲五聲六律宗輔翼俎豆胡炫耀寒  
山寺裏吼清宵霜楓蘭漿聞周遭爾胡爲者墮怒濤君  
不見黃宮潛萌發冬至確隱响嗑旋陽氣豈是物盛倏  
然衰潛深差免人驚異

橫塘行爲家吳山作

橫塘三月春光曉春愁曉罷枝頭鳥嬉春有女出蘭闥  
眼波如月照人好芳草青青日欲斜蕭郎策馬逐輕車  
相逢相熱眉梢語卻贈江南豆蔻花花閒欲訴傷春事  
阿娘續碾香輪至晚煙如抹小桃紅兒家門巷君須記  
一朝畫檻駐青鸞綃金帳底露華團海棠紅嫩嬌無力  
蓮子心多苦不酸層雲深鎖巫山雨那問韶光過幾許  
結綰同心誓不移雙飛比翼愁無羽自春徂夏醒朦朧



忽爾心期謁九重長隄衰柳離筵酒囑咐殷勤繾綣中  
吟鞭遙指長安道深閨從此閉門早小膽惺惺怯憫伊  
游絲縷縷晴空裊何人相對話衷腸回首星河事渺茫  
天外音書難覓雁耳邊琴曲斷求凰徘徊四顧無依託  
阿姨阿姊皆零落欲補媧皇離恨天今生定與來生約  
飯依三寶誰相盼傾心坐斷蓮花瓣愁轉黃河腸九迴  
淚落牟尼珠一串朝朝暮暮苦相思憔悴容顏兩鬢絲  
春宵寂寞投環候慘澹花鈿委地時黃泉一入天難曙  
芳魂渺渺歸何處薄倖吟成決絕辭情根難淨菩提樹  
七月十五夢重帷盂蘭現出女沙彌默默情懷懊復惱

青山詩選卷一

七

珊珊步履是耶非自言棄置誠如願九載尋君君不見  
抱柱方疑江水深翻雲詎意人情變君今有偶妾何求  
當日癡心盼白頭誰知蕭寺祇園裏荒原有骨無人收  
已矣長繩難繫日悲哉團扇恨吟秋休將紅樹西廂月  
誤會春風燕子樓

青蟲吟

青蟲眇眇聲喁喁飛入茅檐刺我膚有客舉筆爲我除  
我手搖搖止其驅須臾風颺日光烈食飽難飛腹忽裂

猛虎吟

狡兔齧人人備防猛虎食人人驚慌一虎負嵎眾虎伏



阿孃倉卒抱兒哭哭聲愈悲怒愈勃齧肉之餘并索骨  
歸雁篇

戍鼓寥寥春社曉東風日夜催花老主賓相與別江南  
煙雲萬里乘風掃峰斷衡陽憶落霞蘆花飄泊又楊花  
新綠依依辭漢苑亂紅蹴蹴過長沙江湖此別無留戀  
寸心急欲還鄉縣留帶音書別故人高凌羽翰防雲箭  
歸程青海灣屈指白狼山長風雲路御回首空榆關稻  
粱謀盡休道苦歸時應共來時侶乳燕翻成簾外春流  
鶯嗁破枝頭雨說到滄桑事黯然秋來春去任推遷來  
經驛路風霜冷去看長安草木妍

青山

青山詩選卷一

九

青山山寺古一徑繞谿行野草帶秋色夕陽聞磬聲門  
關僧入定香冷佛無情獨有檐前栢年年倚月明

秋夜懷柳坡

梧桐秋意思葉葉動西風奈此苦寒夜其如離別衷野  
春臨水急檐樹壓燈紅獨坐不能寐況堪聞斷鴻  
尋隱者不遇

細雨過遙岑疎林黃葉深不聞鳥雀語但覺松風吟流  
水本無定伊人何處尋山空萬籟寂雲木影沈沈

大觀亭宴別



步上大觀亭亭高秋氣冥帆檣千里白天地一痕青樹  
矮江邊月簾疏檻外星當筵莫辭醉明日各揚舡

秋晚對月憶姚石村

砧杵一聲聲秋風萬籟驚遠山連月出細水夾愁生髮  
短添新白更長憶舊盟朝川今夜裏清況有誰爭

月夜泊牛渚

浩蕩長江裏高懸月一輪我來牛渚上不見詠詩人水  
闊魚龍躍林幽花木春天涯知己少悵望一沾巾

經姚石齋故址

明季姚相唐先生棲隱處

洪山多怪石磊落豎寒林萬古青蒼色千年隱逸心北

青山詩選卷一

三

風聲烈烈南國淚沈沈剩有遺蹤在幽泉鳴咽吟

宿桃源

車馬桃源夜鄉心迫旅途離家千里遠作客一身孤雪  
住髮猶凍愁深淚易枯故鄉雲太重歸夢又模糊

天如閣

突兀天如閣誰堪發棹歌魚龍飛棧道風雨下銀河羽  
客浮槎去糧艘激浪過長途如此險其奈利名何

酬友人

古木杈柯立巉巖歷亂躡故人過險道爲我至孤村膽  
大不畏虎夜深常叩門高談猶未已窗外已朝暾



送汪柳坡之淮南

纔脫虎狼口緣何又遠征窮途衣食急亂世死生輕水  
涸魚爭躍林深鳥不驚鄉山有明月夜夜照孤城

尋大觀亭故址

大觀亭畔望不復舊鬼巍煙雨臥殘碣樓臺剩切灰晚  
風燐火亂清夜角聲哀余闕忠魂在吞聲泣草萊

皖江晚眺

萬井幾家在蕭條慘暮煙怪風聲捲地孤塔影摩天戍  
鼓驚荒邸蓬蒿遍野田前途那可望烽火故鄉連

春暮遊銅山寺

青山詩選卷一

三

結伴尋幽境狂歌度石梁巉巖蔭深綠高閣敞清涼春  
老桐花白風迴松子香上方清磬響林隙露斜陽

山居

柴門鄰竹圃無事晝常開山色遠迎客花香數舉杯捲  
簾風驟至激石水流迴更有忘機趣紅梅落野苔

早行

乍上崎嶇路其如跋涉何危橋欹石架孤月背人過山  
氣逼茅屋雞聲冷薜蘿前村猶有虎一嘯踞巖阿

春晚偕曉山松泉芝田遊楓谷作

日暮樵歌起來從谷口行綠苔鋪坐席流水煮茶聲石



隙露微月崖松嘯晚鶯此中堪避世何必覓蓬瀛

冬夜讀杜少陵詩集有感

松老作龍吼月光銜翠螺高吟杜陵集慷慨發悲歌北  
關陰霾久西山寇盜多終宵愁不寐相對意如何

哀長江

乙卯三月二十一日自滬浦至池口屍流七晝  
夜腰繫長髮二三顆者無算追官軍敗死於江

詩以哀之

鶯陣排舟楫貂冠競戰功誰憐征戍士都陷大江中殺  
氣屯雲黑波光帶血紅冤魂歸不得夜夜哭西風

青口詩選卷一

十三

九日偕同人遊虛山洞

絕壁闢邱壑扳雲入洞天崖懸松倒挺逕曲竹斜穿鑿  
險龍蛇走低空煙雨連到來同把酒扶醉下層巔

早起

紅雲將日上茅屋尚雜聲露竹橫窗重風花落地輕細  
泉穿石響飢燕伏巢鳴獨立長廊下嵐光四望清

古意

長天浩浩路迢迢羌笛無聲夜寂寥東海月明鼙鼓動  
西郵雲黯纛旗飄杜陵淚墮三巴水王濬舟沈萬里潮  
我亦含愁在鄉國不知何日解金貂



狄梁公

表裏無時不爲唐中興恨未睹儲王夢中鸚鵡憑張翼  
藥內參苓久在囊祇有千秋傳母子何曾七廟立姑嫜  
試看箕尾歸天日諸武門前已夕陽

秋柳

壬辰秋遭家累羈身孫竹君之淇園時秋色慘  
淡木葉盡脫河干有柳數十本披靡不堪觸物

興懷賦詩三十首以寫艱虞之況云

今錄  
二首

關塞迢迢驛路遙離懷寫不盡牢騷砧敲夜月添長恨  
霜溢汾河冷敝袍瞥眼乍過花世界回頭空憶綠波濤

青山詩選卷一

三

倚欄少婦休爭看煙裏樓臺百尺高

誰家游子買吳舫淚落長亭又短亭千里關山愁寂寞  
十年人事怨飄零秋容慘澹眉空鎖客路風塵眼孰青  
檢點行裝欲歸去渭城一曲怕重聽

春日寄懷汪柳坡

北雲望斷望南雲南北迢迢總憶君一自天涯嗟落魄  
每因風雨振離羣原生衣履闌珊甚巨伯交情今古聞  
何日得如香案吏綠楊春好隔牆分

訪曹爨卿不遇

彈鋏侯門感歲華尚操斑管學塗鴉春風未識廬山面



臘雪常停洛浦車已寫魚書傳海角爲尋鴻爪覓天涯  
相逢倘上江南岸一路梅花開到家

### 山居

小住柴關廿載餘風晨月夕最躊躇常栽松樹巢孤鶴  
偶曝牙籤走蠹魚病起乍驚容貌瘦閒來方覺世情疎  
深山消受無他物一勺清泉一卷書  
燈滿疎櫺柳滿池閒庭夜夜但敲詩一簾花影移新月  
半座苔痕理釣絲梅得春催傳信早雲無風送出山遲  
邇來世味都嘗遍一任旁人喚阿癡

### 老女

青山詩選卷一

七

垂老依然未嫁身鴛鴦繡得不成春蓮房分序慚論齒  
燕喜盈門愧比鄰月下赤繩難繫足臺前青鏡半浮塵  
含情敢向良媒托多少娉婷畫裏人

### 中秋與曉山松泉芝田看月

桂花香裏月當頭爲看冰輪集舊遊一夕皎然如白晝  
十年無此好中秋笙歌嘹唳傾高座煙樹參差倚畫樓  
猶是太平眞景象千戈何事遍江州

### 古鏡

遺篆縱橫鳥迹精鑄時想像出咸京一輪不改團圓影  
千載常留清白名觀我已經無色相照人何必太分明



倘教大厦能容汝多少熒光局內生

九日偕友人醺集懷清堂後樓

亂後攜朋上小樓好憑豪興賦高秋籬邊黃菊釀新酒  
天外丹楓散舊愁佳節相逢須盡醉深山隨處足淹留  
桃源雞犬仍無恙多少風光望裏收

齋居

綠陰陰裏樹重重獨結茅廬對遠峰席上筆奴曾伏免  
匣中寶劍久藏龍無愁自覺花常笑有酒何妨客未逢  
儘把雲山供嘯傲盤桓終日撫孤松

聽露軒雜詠

青山詩選卷一

五

滿地冰紋雜水紋玉堂深處又斜曛青山遠映渾如畫  
紅燭高烧半是雲入座月光憑瑣碎上階花萼笑平分  
蕭疎不礙檐前景多少濃陰酒上醺簾影

落落高蹤且莫論漫隨煙雨敘寒溫斷垣有漏青如黛  
深院無人綠到門掃徑欲迷新屐齒拂牆猶見舊題痕  
倚欄恰值花飛候小貼春風蛺蝶魂苔紋

一夜瀟瀟夢不成碧紗窗外黑雲橫如將濃墨淋漓潑  
無數綠珠高下生綺閣燈搖團扇影畫欄風落翦刀聲  
誰憐千萬重重點不展愁心滴到明蕉雨

齊山



落日寒蟬鳴流水澹人影采樵僧未歸瑟瑟西風冷  
贈別

家貧無物贈欲贈一帆風送君往江北吹夢到江東

石上作

心閒常覺水雲寬頻撥湘絃石上彈彈到水流雲不動  
萬花陰裏月如盤

乍別

乍別東風日欲斜湖雲難駐碧油車相思一片如春草  
綠到天邊未有涯

玉鉤斜

青山詩選卷一

三

綠楊最怯朝煙重芳草猶嫌薄霧遮休說風流似煬帝  
祇今愁殺玉鉤斜

高公墓

古今多少逃名者偏惹旁人說短長誰似高公原上草  
青青無語對斜陽

青山詩選卷一

終

詩人選宋謝靈運謝靈運西風令



青山詩選卷二

章

凌曼卿著有自  
己山房詩鈔

江東橋

晨出江東門策馬江東橋大風發浩想慷慨歌前朝元  
運帝不祚草澤競雄梟真人志驅除提劍來臨濠上游  
逼強寇窺伺時釁挑招致張吳師大舉思吞包開國鬱  
風雲上下秦未交鬯驚雷震怒鼎立足動搖事變在倉  
卒兵食苦未饒蔣山險可據眾議方騰囂青田子房儂  
借箸陳超超士誠自守虜無事勞心切西師雖十萬其  
態狂且驕天道後舉勝人事速至邀昭之以大利給之

青山詩選卷二

一

入籠牢爰命康將軍一紙飛相招楚人方弑義意氣無  
漢高樓櫓下太平指日壓南郊投鞭快飲馬探卵試覆  
巢老康老康聲聞者胡寂寥峩峩盧龍山白日翔青霄  
蓋除赤幟舉鼓震黃幟標伏卒莽四合機發凌風颯徐  
常馮趙輩虎躍而龍跳呼聲急雨注水際尸橫漂膽落  
第五王柵奪舟已膠一陣黑旋風蘆葦聲蕭蕭火縱磯  
石楮搏戰窮追鑿曹瞞赤壁遜符堅淝水逃萬死出餘  
命流恨翻江濤古來石頭城兵到降旗飄形勝亦江左  
樞坐昏斗杓惟明皇天授洞決窮秋毫大險不爲動大  
倖不爲僥人傑匪地險眷顧存昭昭咄哉魚鹽徒暴虐



馳分鑣一敗其塗地千載供笑嘲祇今緬戰伐青史書  
條條斯橋亦元勳巍然跨竦鰲當日鬼神功鐵石治通  
霄其石未剝泐其鐵未沈銷明月鎖淮水春宮起玉簫  
江山猶昨日城郭尚今朝多少興亡迹來潮又去潮

訪友

十笏茅草齋四圍好結束短籬折柴扉流水寒一曲初  
日飛金烏雪耀半峰玉山人只在山何處藥物劬童子  
或來歸鶴立無羽屬風閑磁酒樽雲冷石棋局梅花撲  
面香竹外一枝綠

感古

青山詩選卷二

二

世間兒女子小別亦愁顏況此傾城貌胡沙去不還宮  
中齊下淚太息畫圖閒那識毛延壽蛾眉賣一彎  
匹馬猛如虎百戰披重圍出塞一萬里不得封侯歸拔  
劍舞明月月明霜亂飛男兒時不利壯心何肯違

化城寺前銅塔歌

化城寺前銅浮圖高逾丈二圍十夫粒粟彈指七寶現  
陰陽鑄就何年爐款識莫辨歲月失佛樓夜與翻志書  
上有爵秩黔國字云自萬里滇南輸想當黔國掃清邊  
氛握虎符紀功銅柱絕域餘枉矢投哨壺歌呼時鳴嗚  
蒼穹浩浩恩罔極欲報未報持寸區窳堵波幻僧婆居



紅塵一騎江南趨金砂遠於福地聚玉帶永鎮山門隔  
羣僧寶貴同璠璣旃檀頂禮擢瑜鋪法樂嘹唳喧笙竽  
守佛生日如守株神光默合互迴護鐵氣渾與凌空虛  
炬峰噴繞紫煙霧池鱗翻射赤鯉魚朝霞煥彩瑞露渥  
風日曾自標高孤幸哉未遇後周代兵銷炮毀充銷銖  
侯碑公鼎久寂寞盤宮瓦多邱墟是物儼爲神所護  
層巖等級無差殊臭聲雖則佛頂穢性真挺特猶本初  
名山合藏法器物無量壽攷千秋呼太白若見定有句  
陽明賦筆未及渠鏘金戛玉寡聲調浩歌子獨慙巴歛  
夜深星斗爛四角錯落綴繫如明珠百千萬億像跏趺

青山詩選卷二

三

毫光舍利鑑髮鬚旁映九十九峰金芙蓉

趙知微登天柱峰玩月歌

八月十五中秋節雨瀟瀟兮風瑟瑟濃陰密翳掃不開  
無計可呼姮娥出九華道士趙知微碧雲星冠青霞衣  
六丁五雷能攝取分杯結霧曾恥爲對此茫茫清興發  
今夕試與探根窟仙人遊戲得三昧略顯神通弄狡猾  
置酒遍召同門生玩賞欲作升天行諸生竊笑私議擬  
經旬晦暗湓而止那得濯魄挹冰壺將毋墊巾虞折齒  
趙君曳杖如游龍諸生倒屣相景從月明如晝又如水  
一輪已挂天柱峰諸生意氣凌八表驚駭此時定不少



師道雖則自信專月華莫識今宵好趙君身處元豹茵  
諸生藉草列坐鄰瓊杯綺食雜簫管瑤琴錦瑟次第陳  
步虛俄發景純詠清嘯時帶鸞鳳聲興闌曲罷望超忽  
寒蟾西墮影欲沒諸生漫賦歸去來趙君天際猶徘徊  
此宵此月不常好富貴浮雲安在哉延華歸路互響答  
解衣扃戶各就榻飄飄灑灑枕上聲側耳依舊風雨合  
仙蹤縹緲已千年詩人歌此亦偶然世閒曖昧方同夢  
壺裏生涯別有天

玉壺園看花行

去年曾訪桃花來春風首向花前回今年又與桃花遇

青山詩選卷二

四

主人招子花深處花閒著屋屋藏花城市那得如君家  
壺天小住攜眷屬笑語時復飛煙霞雕盤綺食排芳讌  
花與主人客相見看花須及桃花春賞花共點桃花麵  
桃花對客喜欲狂嫣然四面圍紅妝風中翠袖互飄舉  
以酒壓客勸客嘗主人向子索詩句余與桃花曾有故  
銀管都搖琥珀光玉山欲倒珊瑚樹紫鸞簫奏紅牆邊  
夕陽西下黃昏天時人共羨春如海我輩當筵醉似仙  
桃花桃花須愛惜世閒無此好顏色今朝有酒飲莫辭  
今夜有詩題不得青天明月來當頭桃花桃花我欲愁  
從古佳人多薄命琉璃易碎彩雲浮桃花桃花與汝約



漫天匝地張繡幕都與深藏洞口春莫教細逐楊花落  
歸時疑出武陵灣再來應不迷仙山願君駐得紅顏住  
歲歲年年共往還

後看花行

小樓夜歸聞滴瀝千株萬株盡一夕天明好友攜將來  
咨嗟不已頻太息昨日含笑臨春風今日低首污泥中  
今客依然昨客是昨花不與今花同我歌贈花花答我  
花亦有如落魄者飄飄蕩蕩東復西芳蹤幾欲遍天下  
一陣一陣如驚沙紛紛蚨蝶過鄰家一團一團似飛絮  
漫漫吹舞滿空際恰有一片天上來繞枝三匝猶徘徊  
隨人襟袖出門去卻復又被風吹回花如戀主人依依  
不肯行主人亦花戀愁鬟垂楊線幾回愁倚詞客筵幾  
番慵拂歌姬扇殘脂剩粉不忍拋杯杯把酒都澆遍北  
海忽發愁中歌茫茫對此百感多予生作達不爲意盛  
時其奈相見何桃花桃花吾語汝予歌君試勤聽取世  
間萬事總由天榮枯那無數與主桃花桃花何必恨如  
許且須當作浮雲一望過玉壺買春同賞雨

橫山源

池之橫山源向名黃山吳樓山先生以與歛之  
山名同易之其山自下至上高約六十餘里僻



處奧區人迹罕到深秋有客以兵衛得至山半  
歸道其勝賦詩紀之

池陽山水窟子生托家園千峰萬峰中奇絕橫山源橫  
山之峰高高出天表世人那得窺其藩上有三十六垣  
開闢以來古日月下視匡廬九華猶兒孫可望不可卽  
雲氣迷朝昏深秋有客到約略向余言白晝山鬼亂跳  
躑黃熊當路猛虎蹲巨藤跨虹亘空際往來飛渡唬哀  
猿百圍怪木作風雨麀軍戰馬溪聲奔琪花瑤草有仙  
致拾瓣莫與詳靈根余家咫尺不得到聆此不覺飛吟  
魂古來湮沒知不乏特爲表出鬚眉尊絕幽鑿險發奇  
語頗失混沌傷渾元安得太白一詩句留傳天下後世  
長與存

采石覽常開平戰處

危磯瞰江表繩引可尋丈傳聞忠武王超距此飛上守  
兵倉黃壁壘中猛虎附翼能翔風橫衝直突大跳盪機  
弩難與爭其鋒將軍蓋代奇男子生平目未涉書史用  
兵決勝智如神不患不戰患輕死洛水之北鄱陽湖一  
人可當十萬夫橫行天下詡無敵好殺畢竟生性俱中  
原平定高皇帝祠廟功勳位第二符封錫子鐵券文藏  
之子孫傳世世長星飄落大營前將軍身逝柳河川弓



藏有鳥高飛日肖像雞鳴獨宛然

### 九連環曲

九連環玩物也不知誰何所創造形似守宮以  
銅環串銅柱彎而環之如魚貫然閨中思婦當  
子夜懷人際多手弄之以解釋愁恨按其數有  
九殆取一日九迴腸之意乎有曲弄時則歌之  
與環聲條脫聲相上下予愛其製極巧事甚韻  
嫌其曲鄙俚爲擬風雅體歌之章視其數

迢迢長夜輾轉欠伸云胡不寐懷我良人

解一思撫瑤琴

以寫我心愁深意亂恐不成音

解二思理錦瑟錦瑟五十

青山詩選卷二

七

絃絃繁柱促思之復不然

解三欲操胡笳胡笳一彈一十

有八拍邊音塞調聲繁劇妾非文姬且將他擲

解四今夕

何夕蟾無光起視銀河夜未央秋風颯颯掀羅裳檐前

鐵馬聲丁當觸我九連環此夜九迴腸

解五腸九迴心欲

灰環九連心似奠阿誰作此作此洵稱賢阿誰解此解

此意纏綿解六一環一環解一環一環生匪釋妾懷恨益

傷妾衷情

解七我手纖纖我淚交并我體已羸我夢欲成

一聲兩聲雄雞亂鳴三更四更秋太淒清

解八噫吁嚱九

曲之珠蟻能穿九連之環解者難

解九

### 湖上行



郎家湖上村湖水正當門妾家清溪住溪水屋傍渡湖  
水不如溪水清溪水不如湖水深湖水如行大江裏風  
波有時頃刻起溪水如行明鏡中照見郎容與妾容

春夜月下宴桃園放歌

一年三百六日月明幾何度花開幾何番人生在世  
百年耳何苦效蛙鳴甌蝨處禪昨日方紅顏今日已白  
髮在地怨落花在天恨明月吾觀古來作達人太白落  
落超風塵幾回曾作把盞詠幾回曾負花月春我輩縱  
然量無一石才八斗安能煙荒草滅寂寂終其身花如  
解吾語月又當吾頭花閒月下一杯酒風流今古皆千

青山詩選卷二

八

秋人生百年內花月良悠悠功名富貴浮雲浮舉杯消  
愁愁更愁花亦不過與之暫相對月亦不能使之常爲  
留花月那得時遨遊花雖有時落花落還復開月雖有  
時去月去還復來人生百年一日一日似流水奔流到  
海何時回飲君酒歌君詩君勿搖首勿推辭但遇月明  
夜更逢花開時寸陰尺璧良足惜黃金駿馬須何爲會  
須暢飲百尺樓頭高朋滿座酒揮毫寫出皓月萬里花  
千枝

九華九十九峰歌

我聞九華九十有九峰一峰一朵青芙蓉山靈祕惜自



前古遊歷未涉太史公太白當年誇妙有江上相逢一  
揮手流傳五字韋高詩遷客南來齊矯首我家秋浦恣  
遊遨前年曾度五溪橋登樓一作白雲夢枕席空有吟  
魂飄去年泊舟梅根渚雪花手掌大如許望中九幕垂  
蒼蒼玉屏遙隔靚妝女今年一笑登山來振衣把筆凌  
天臺眉飛色舞眼開豁咄咄眾峰真奇哉翩若鷺鴻飛  
翔如威鳳起怒似神獅蹲逸如奔馬駛玉樹臨晚風蓮  
鏢涵秋水一峰天半明朱霞風鬢霧鬢來雲車一峰晴  
明一峰雨一峰崛起一峰舞如笏如釜如覆鐘如矛如  
戟如刀鋒突如塔頂摩蒼穹仰者如承俯者抑削者如  
圭銳者筆更有一峰迥不羣縹緲有如空中雲餘峰瑣  
細莫能狀但見皴冰裂壁刻畫破碎一色青天紋吁嗟  
乎九華之山自是以峰勝天下名山無與競君不見峩  
峩秀出廬山高天台雁宕窮周遭女几荆山非其曹又  
不見武夷之峰環九曲太華三峰撐鼎足雲鋪黃海歌  
天都圖記但傳峰六六

謝癡子行

事見邑志

謝癡子家住杏花村叫化大道邊龜趺蝦蟆蹲朝朝復  
暮暮來來往往人紛紛不知誰何氏遺失道旁銀包以  
皮紙裹汗巾謝癡子據榆枌拾之不覺雙眉顰謂予不



遺若若倘富貴猶可原貧乏性命難保存是銀必然還是人靜俟大道邊自日中昃至於昏其人急遽前有似渴驥奔張皇四顧上下巡謝癱子知情真探懷舉銀還付君其人隨手將銀分謂此一半汝一半留自身謝癱子大怒曠掉頭不顧揮手頻余雖一丐者非分之取從未聞慎勿等余齷齪倫天色暝矣歸云云其人忙作謝連聲稱感恩長揖而跪再拜陳謝癱子答殷勤倉倉皇皇際身忽豎立腰忽伸一起一伏忘艱辛舉步大笑還家門里巷有語哄四鄰報應如此速且神癱子不癱長子孫精於風鑑能相人人人有若謝癱子道不拾遺風俗醕嗚呼謝癱子雖窮民垂之志乘千萬春

青山詩選卷二

十

貞懿夫人血影石歌

夫人翁氏明黃文貞公觀妻遼國時公徵兵上游死節列籍紆黨夫人並二女被收給象奴夫人給奴出攜二女及家屬十人投淮清橋下死臨死時嘔血石上成小影陰雨則見僧眾以爲大士像昇至庵中供之一夕見夢曰我黃三元妻也比明沃以水影愈明有愁慘狀後移至秦淮文貞祠內龕焉

有石不投洪鑪鍊補媧皇天有石不銜精衛去把滄海



填浩浩落落一腔血灑向其上將神傳初疑大士像繼  
看乃知翁夫人夫人之貌亦莫辨其確肖否但覺當日  
精誠之感上格天與神一片石寫其眞空堂雷雨生晝  
冥罔兩潛匿狂狐奔靈旗飄拂幄幔動時見座上來幽  
魂我聞此語嗟咄怪一番嚴肅重下拜昔讀西堂樂府  
詩如披青史瞻圖畫今來白下感飄零石猶無恙龕中  
庭詠歌曾莫廢昭代香火緣深故里情青溪女兒貌如  
玉但知賣笑鬻新曲無人解識卞忠貞誰復湘干弔斑  
竹老屋荒涼單渡頭風磨雨洗秦淮秋片珉自足垂千  
古檻外應非對濁流我復重沽一斗酒酹石祝石石知  
否固堅爾自貞潔守天與同長地同久我再問石將石  
叩石爾何知亦何有長此芳名傳不朽我叩問石石不  
言石上之影如點首卽石卽影卽是血石與血影無分  
別卽血卽影卽是石往可遺來今憶昔嗚呼胡中庸解  
大紳無瑕不有玷甯莫逐燕謹視豚對此明明白白一  
彎碧血影能不愧此巖巖巍巍七尺丈夫身

贈劉芝田

誰歟瀟灑美少年揮毫興致來翩翩仙語鬼語菩薩語  
雜作一體爲長篇蘭茗翡翠珊瑚架五言高格摹三謝  
揚帆雖未發東海風和日麗亦閑暇贈我一百五十言



言言微遠字字元書堂相對一樽酒宛爾紅藥當階翻  
別來卻無幾時日才思迅發如此疾意當刮目相待看  
駿馬奔騰勢超逸我昔發憤曾爲詩雕繪物態期精奇  
潛思渺慮極八表惜無繩尺來良師讀書萬卷行萬里  
古人是語良有以謂宜蕩闢此心胸生面獨開稱一子  
無端困頓忽相侵百樣飄零萬感深牙琴付與東流水  
阮嘯來於嘉樹林襟懷當日殊落落生計無從苦蕭索  
寶劍空爲壯士吟月高時唳雲中鶴今日南山又遇君  
感君意氣凌青雲故園風景依然在樹頭紅葉爭紛紛  
挑燈重把君詩對腰閒解贈瓊瑤佩此事原須讓後來

青山詩選卷二

十一

風流莫漫誇前輩舉酒屬君君謂何加餐努力更高歌  
人生莫歎無知己古調之彈原不多

題上官生畫汾陽橋餞別圖

三尺劍千里駒雄心欲死神偉如一杯酒千金諾烈士  
不欺言自若丈夫豁達意氣平此別莫是西京城裘帶  
簡逸僕從寂旁亦少一天仙人或者靈石別旅邱山寒  
木落路齒齒圍爐門內草囊無細觀靜擬卻不是河流  
活活風蕭蕭霜天曉角聞麗譙疑而未決意思遠此圖  
斷是汾陽橋太原公子龍鳳姿空中有氣誰望之事已  
八九局全覆所貴豪傑能見幾隋煬之季勢解瓦天下



紛紛起兵馬幾人稱帝並稱王螳臂共沒車輪下尺幅  
風雲善卷舒畫師想亦有心者美人紅拂是英雄慧眼  
從來寫不工世無大俠虬髯客落拓當時李衛公

天臺峰

九十九峰內天臺高一峰振衣千仞上低首數芙蓉筆  
洗銀河水詩題羅漢松靈仙非幻說月下見麋蹤

方正學先生祠

十族無遺種千秋有定論綱常爭痛哭揖讓到兒孫事  
豈諸臣誤源由太祖渾崇師頒佛老瓜蔓已蟠根

金山

青山詩選卷二

十三

對面浪千尺江心湧一峰高臺有明月雲水忽相逢只  
此爲蓬島何須問赤松惟憐蘇玉局落落弔遺蹤

秋浦夜月懷李白

萬壑猿嘯雪千巖花弄春從來秋浦月無此好風人白  
髮飄愁去青山入夢頻何當一樽酒迎奉到江濱

江祖石望萬羅山

千載謫仙去名留片石閒尋常一溪水咫尺萬羅山天  
闕中閭闔白雲時往還書堂讀書好太息不能閒

蝦湖月夜聞石航吹笛

自從燒二失此耳不玲瓏偶到石壇下坐來明月中似



聽龍吟水如飄梅落風陽關得高弟還與奏三終姚二名潛  
號白雨山人善吹笛工篆刻  
石航其弟子也能傳其藝

### 橫山源

池上峰千萬尊都讓九華那知山水國別有羽人家蹟

以延陵著名無太白誇大江南眺望隱赤城霞橫山源有

石牆削成干仞壁立五里如金城百雉不可攀  
梯其石段紅碧綠雜絲相間宛如赤城之霞

### 皇覺寺

芒碭雲猶繞故鄉大風歌唱起濠梁百年家世三遷徙  
千古浮屠一帝王父老尚誇龍虎氣河山都是戰爭場  
行人繫馬西廊下空對豐碑甲夕陽

青山詩選卷二

古

### 吳桓王廟

入門相識氣如虹冠冕垂旒想像中天意有心興魏武  
地形無恙王江東千秋付託情何重百戰風雲恨未終  
每歎虞翻存直諫白龍魚服悔英雄

### 過金公書院遺址

公諱焦官侍郎從建文入蜀入滇後亡於汴書  
院公當年讀書處也在梨家店大道傍今沒爲  
菜圃作此弔之

免葵燕麥怨斜陽猶是金家舊講堂千載疑文裁別史  
一官傲屣棄南荒遺祠誰奉春秋祀習井猶傳姓氏香



我欲臨風歌楚些忠魂何處托家鄉

中秋月下聞笛懷柳坡竹園

長空浩浩水平流洗遍青天萬里愁此夜何人吹玉笛  
箇中有客望瓊樓淮南拋別書千卷嶺海飄零酒一甌  
好友不來明月在高歌唱徹廣寒秋

燈花

繡閣書窗至夜闌每逢卿處令人歡多添膏沐加培植  
少待推敲怕落殘金屋東風原不覺瑤臺春色正無端  
相占帝里登科夕贏得紅顏帶笑看

子夜青霜不受侵欺他聊作歲寒吟光聯學士紛披筆

青山詩選卷二

十五

巧奪天孫組織心熠熠非榴長噴火熒熒如粟暗排金  
韶華那只春光好誤卻莊生幻夢尋

白筍陂

唐年祠樹暮蒼蒼苦竹猿聲兩渺茫花落鞏疇棲隱處  
雲封李白讀書堂神仙誰共談元妙山水依然守狷狂  
此夜月明籐榻畔寓公處士夢禪房

劉晴峩欲爲北上之舉不果客清江浦

生平一往情深處半在良朋半異書千卷與君雙目共  
百城假我數年餘素衣作客停江浦衰柳題詩滿綺疏  
未識晴陽芳草色天邊看到定何如

晴峩有秋柳三十律又有句云相思



一片如春草綠  
到天邊未有涯

### 清明遊杏花村

小橋西去緩行行媚紫嬌紅一路迎煙際樓臺山鳴寺  
水邊簫管柳枝鶯夕陽返照開圖畫舊雨關懷見性情  
最是故鄉好風景杏花村裏過清明

### 文選樓

風雨臺城總渺然儲君事業重遺編高樓猶占南朝地  
福主重瞻故國天不向揚州愛歌舞卻從峴首眺山川  
何如秋浦澄潭月萬古昭明一鏡懸

### 贈柴道士

青山詩選卷二

十六

道人終日坐蒲團鍊得光明一顆丹小府門前晴放鶴  
大樓山頂夜驂鸞世間何處埋金骨天上方疑下玉棺  
我與仙壇有緣法願爲雞犬託劉安

### 風起

風起楊花欲化萍無端墜溷更飄茵黃梁誰爲炊殘夢  
青眼曾蒙識異人滿地榆錢難買醉一身金骨不憂貧  
年來悟得長生訣始信神仙自有真

### 岳陽樓

秋空浩渺際無涯刻卻君山亦快哉望海亭前輸此樂  
臨江閣上窘吾才乾坤獨有詩千古雲夢遙吞酒一杯



廣樂忽張明月夜羣仙都過洞庭來

二喬墓

辛木情深連理樹汀蘭花發竝頭春生何有幸聯佳瑁  
死尚同居號美人白鶴山神龍女近黃陵廟貌帝妃鄰  
當時不傍喬公墓卻葬瀟湘二水濱

甘興霸祠

江東一廟富池開百騎聲名訝若雷落葉似爲雙戟舞  
靈旗如寫錦帆來紫髯畢竟依英主黃祖焉能識將才  
聞說當年神異顯沈郎遺墨共低徊

一作聞說將  
軍嗜書法

沈睿達事見王漁  
洋分甘餘話七句

青山詩選卷二

十七

答劉晴峩

當時慨慷登舟去萬里長江誌壯游墨灑層霄廬阜晚  
杯翻明月洞庭秋蒲帆直下晴川閣玉笛橫吹黃鶴樓  
忽作真人天際想風雲龍虎在丹邱

重遊相公墩三步前韻有懷姚北海嶺南

鎮日禪堂面水開疏鐘又送暮潮回時維九月波濤息  
鞠有黃華鴻雁來嶺海客頻縈我夢湖山詩豈見君才  
何當故國重陽節再把登高酒一杯

梅岑書屋與逸齋叔夜酌用中秋韻

山堂樽酒續風流撥盡寒鑪話未休一幹老梅香欲臘



滿輪明月韻於秋，高歌聲有蒼涼氣。狂飲情無偏仄愁，傳出昔人詩萬首。論功可拜石城侯。時子方編輯池陽詩鈔

### 樵雲山房姚石村留予夜話並弔北窗

相逢又是落花天，琴劍飄零各慨然。溷迹漁樵山水窟，悲歌戎馬亂離年。黃塵慘慘顏將老，長夜漫漫客已仙。何日隻雞並斗酒，與君同弔墓門前。時北窗新故約共往弔墓未果

### 寄姚北海

十五年來花落後，八千里外客歸遲。聞君昨夜騎蛺蝶，遇我南中噉荔枝。湘子臺前同訪道，羅浮峰頂各題詩。團團紅日扶桑曉，驚醒天雞一夢時。北海昨歲夢子至潮州

### 青山詩選卷二

六

雨雨風風擾不休，狂吟憶與在池州。南園忽下賢書第，西廟同登文選樓。從古幾人垂著作，祇今華屋感山邱。歸來共訪神仙去，高臥天都峰上頭。人生在世原如客，老去其如久客何。須識他鄉非計策，況逢此際又干戈。華陽不少佳山水，池上方興古嘯歌。知否青山吟社裏，釣磯還辦一漁簑。

### 送友人還楚

酒盡帆飛天末秋，煙波江上送歸舟。他時我醉別君處，定在武昌黃鶴樓。

### 訪劉子安



春風尋友復尋芳，尋遍南山水上莊。門外碧桃花一樹，此中知是住劉郎。

懷北海

書劍飄零各慨然，嶺南消息隔遙天。玉壺園裏看花日，回首春風十五年。

除夕

風雨廬中萬感餘，干戈隙裏混居諸。累朝文獻愁遺佚，存得池陽一部書。

時余方編輯池陽詩鈔

望九嶷

李白詩歌秋浦中，長沙風物故鄉同。酒酣每向江頭望，

青山詩選卷二

十九

宛爾青青九子峰

口號

詩豪原擬李青蓮，鳳泊鸞飄八百年。記飲汴京樓上酒，被人呼作地行仙。

青陽道中

楊花撲面酒初醒，馬上敲詩鞭不停。忽見萬山低讓去，九華遙露一峰青。

書吳梅村集

絕世風情歷劫餘，當時何不賦閒居。貳臣傳裏從頭數，還有虞山老尚書。



臥樓有感

一帶楓林映畫樓  
白頭憶話夕陽秋  
樹猶如此人何在  
落葉滿山成古邱

青山詩選卷二

二十

青山詩選卷二終



青山詩選卷三

劉

含

湘漁著有漱石山房詩草

送竹園之嶺南

江南春正好何事泛行舟况此一  
回別飄然萬里遊雲情隨驛馬  
花夢寄沙鷗執手一相問離懷  
似我不

夜渡

丹楓葉落露寒林棹得扁舟夜  
已深風靜櫓聲流浦外月明帆  
影散江心菰蒲歷亂漁歌起城  
市蕭疏戍鼓沈鄉夢不知歸路  
遠清宵飛上最高岑

梁山阻風

青山詩選卷三

長風斗起萬舟還鯨湧豚吹頃  
刻閒吳楚雲低天入水帆檣林  
立浪如山西江弔古臨牛渚采  
石尋僧扣鶴關如此波濤行不  
得故鄉何日唱刀鐙

採蓮曲

採蓮舟泛畫塘西蓮子團團蓮  
葉齊未嫁女兒年十五綠波雙  
槳鬢雲低

玉鉤斜

青青芳草玉鉤斜憑說前朝帝  
子家無數香魂招不起春風吹  
徧野棠花

姚穀人

沙溪



送竹園之粵東

作客南中路迢迢萬里餘從來無一雁此去斷雙魚瘴氣吞珠海邊風墮棧車羊城休久滯白髮倚門闕

春暮小南樓與竹園夜話

風定爐香一縷浮柝聲催月下簾鉤話長夜漏偏嫌短人去春光不可留細雨子規啼嶺外落花蝴蝶夢揚州  
青山畢竟家園好底事年年作客遊

題小照

色相空空莫認真好從面目悟來因他年鬚鬢如霜雪還是今朝畫裏人

青山詩選卷三

二

邗江返棹

買得扁舟一葉還東風送出綠楊灣廣陵羈旅無多日又看江南舊處山

汪

柳坡著有聽泉山館詩集

種苗

種苗東皋下土沃苗未滋植根非不堅毋乃興作遲鄰人爲我言努力還耘耔早華雖未能晚實庶可期感此傾我心朝灌復夕治人事一以盡天時豈吾欺

結廬

結廬往幽谷澹然寡塵緣既耕時復織所樂在桑田荷



鋤夜來歸山月隨人肩篝燈照四壁軋軋機聲連微雨  
灑東臬好風扇林煙桑麻會有秋禾黍欣逢年歡言摘  
園蔬斗酒招鄰賢緬彼桃源人游心羲皇前

園林

園林動春色生趣何天然輕寒漸以消眾卉各爭妍開  
門挹翠螺萬樹排巖巔濃翠煖欲滴幽禽鳴我前抱琴  
坐溪石息慮揮湘絃微風水面生遊魚去復旋物類欣  
有得吾生貴自全毋爲苦營役碌碌逐塵緣荷衣會一  
著笑拍赤松肩

清明偕北窗遊青山

青山詩選卷三

三

巉巖俯溪流古洞闢山腹初入氣陰森冥濛若無矚倒  
影射天光怪狀駭心目石肖鬼神形猙獠各起伏四壁  
綴奇文龍嘘雲氣簇清泉耳際零聲細不可掬逕滑懼  
深探旋身憩巖屋當門露遠峰蕭蕭映疏竹

秋日與石村北窗芝田讌集綠雲軒

高朋集竹軒虛堂蔭深綠微風拂檐檻輕聲響碎玉久  
別情愈親言笑歡未足細雨溼寒郊行蹤一何促

偕同人宿太和山館

攜朋度石梁扣關訪小阮危樓枕溪流欹欄睇絕巘空  
林木葉凋寒山列平遠半嶺響樵歌曖曖人煙晚嵇呂



抱琴絃欣然啟幽幃秉燭恣清談終宵忘息偃曙色透  
疏櫺荒雞亂鄰苑欲別轉遲遲霜花凝隴坂

吁嗟篇

烏兔有盈昃覆載意無私煦嫗及萬類竝育復奚疑時  
窮遘陽九豺虎肆淫威哀鴻棄中野室家靡孑遺名都  
雜榛莽窮谷罹顛危饗煊苦不繼悉索責多儀天高邈  
難籲令迫誰敢違此身分溝壑淚爲老稚滋蒼生愧何  
補願言策熊羆背城當借一封疆義毋辭

微禽惜身命避地圖其生畢竟猶繒繳加巢覆身亦傾貪  
夫甘殉利烈士甘殉名蜉蝣寄天壤立念苦不明泰山  
與鴻毛判然誰重輕

青山詩選卷三

四

阮籍哭窮途當世譏猖狂含懷強混俗飲恨一何長淮  
南荆棘地遊子託何方有家不得歸故鄉斷稻梁烽煙  
日告警安知存與亡倚閭盼白髮淚眼穿斜陽含飴哺  
雛燕啞啞口猶黃簞瓢慮莫給頤養胡可常我罪竟伊  
何悠悠問穹蒼俯仰一長喟霜風摧剛腸

寒宵苦無寐中夜發哀吟眾情懼不察翻謂狂魔侵公  
私困塗炭羅網密山林安能翔天外逍遙作仙禽時危  
計身後沒世覓知音草木同枯朽無乃非素襟季長自  
愛笛成連自嗜琴吁嗟達人逝焉明志士心



冬日訪桂丹盟先生於西山

載飢上西山芳徽景前哲鳥路躡煙雲茅亭枕溪月傾  
懷愜素期古道溢言說曙色促分襟清風動薇蕨

送石村之崇州

南邦苦喪亂千里無樂郊行人似秋燕驚飛別故巢烽  
煙不遑處安計道路遙離情惜落葉迴環戀舊條中途  
忽飄散奔逐隨寒飊悠悠江水深我屏山高蛟龍夾  
岸吟豺虎當道嗥白日慘無色旅魂爲之銷我有清商  
曲與子慰寂寥愁懷願自舒到處慎風濤

金牛石歌

并序

青山詩選卷三

五

石在狂瀾溪距余家半里許橫互波際當流之  
衝身曲而首俯若側臥然余嘉其質異惜置之  
非所作歌以誌慨云

狂瀾溪頭深百尺煙波浩淼鼉窟中有怪物枕洪流  
巨如神獅黑如墨卷蹄側臥身半欹頭角深藏微露脊  
濤衝浪激不肯鳴土人云是金牛石臨流縱觀驚且疑  
披苔剔蘚歎復惜牛兮牛兮汝何辜託身非地徒自感  
天生異質豈無由棄取在人用各適或隨蓑笠伴三農  
犁鋤耕徧春風陌或開火陣助千軍重圍突破奇勳赫  
或隨蕭艾薦山川馨香上達神明格泉石牽來隱逸倫



閒關跨去蓬萊客夜半齊門處士歌空山角上曹劉籍  
縱難大用爲汝期何妨小著勤勞績胡爲棄置水雲鄉  
泥沙埋沒平生力短繯差免牧童羈長鞭猶駭漁人擲  
浮沈河伯見彌珍偃仰蛟龍不敢食吁嗟紛紛流俗情  
隱諷無端飢負輓

有所思

夜漏未歇荒雞鳴欲眠不眠百感生伊人萬里隔秋水  
皓月一輪空際明殘星幾點挂天河樓閣朦朧煙樹多  
朝來縱有相思夢重疊關山奈曙何

姚竹溪蘭竹歌

青山詩選卷三

六

板橋畫蘭先畫石一葉一花創新格坡公畫竹多畫風  
生氣矯矯如游龍姚生妙技世罕有坡公板橋竝一手  
興酣落墨何淋漓滿紙但見煙雲走風塵寥落賞音稀  
漫把名流當畫師江南奔逐復江北空向長途抱璞歸  
歸來安蹈舊時轍以硯爲田耕藉舌衣鉢還憑弟子傳  
壯心時爲同人熱空谷深藏不厭貧羞將花樣逐時新  
桃源漫問滄桑事自是羲皇以上人寶光天地終難祕  
定有風胡能望氣人生知己會何常不在當前在後世  
我家咫尺近君家澗多修竹谷蘭花門前一帶天然畫  
絕似先生水墨嘉



負嵎虎

虎咆哮據巢穴搏虎無人虎威烈難發西山西下莊一  
死人悲啼勢趨南山南馮婦一竄棄江潭名都踏破薄  
京口海風嘈雜鯨鼉吼分羣北渡幽薊驚桑乾橫截虎  
不行河北虎蹤絕江南虎未滅虎怒一嘯白日黑恢恢  
天網不能張彼蒼夢夢我心傷

假威狐

虎勢弱狐膽落虎威強狐氣揚一狐作崇百狐助張牙  
舞爪踞當路我欲擊狐畏虎怒虎怒啞人奚惜一身跳  
梁入市波及鄉鄰亦有賁獲挾弓弩聲言往射眾人阻  
有犬有犬勢驍捷搖尾乞憐主心悅飽以梁肉繫金鐐  
珍汝以汝善遊獵圍場高撒南山巔焚林驅獸獸突前  
獸欲噉主主促急呼犬攫獸犬卻立

孤飛鳥

雨雪霏晨光微雲際孤飛鳥天涯覓食歸鴉鷓中道伺  
藏身苦無地餓糧攫盡摘羽毛霜風颭颭鳥悲號可憐  
密羅張故國浩浩長江渡不得返哺望斷心若焚窮途  
籲天天不聞

上灘下灘歌



梅子熟梅雨寒磯頭溜急上灘難一纜蟬聯百夫挽十  
步九退摧心肝中流風緊泊不得桅在呀啞纜欲折客  
子篷窗面失色

霜花飛河水淺磯頭溜急下灘險倒轉船頭隨水流回  
身全賴篙一點過此揚帆自在行丹楓兩岸棹歌聲客  
子篷窗酒滿傾

山居春暮

野性愛邱壑結茅臨翠微落花催蝶散芳草逼春歸流  
水自今古白雲無是非升沈看魚鳥獨自倚柴扉

清溪晚渡

青山詩選卷三

八

日暮客心急渡頭爭晚槎魚鱈都挂柳塔影欲沈沙高  
樹明殘照空潭蕩落霞謫仙留宿處隱隱起悲笳

齊山

路轉柳隄盡尋幽到梵宮苔生峰自瘦雲去洞還空芳  
草馬蹄綠夕陽牛背紅九華最名勝無復此玲瓏

登太白樓

有客恨千古狂歌夜泛舟青天留片月江上照高樓載  
酒我來飲騎鯨何處游臨風一弄笛吹起玉關愁

狂士

山林一狂客舉世少知音胸慧有日月目空無古今茶



邀名士品花替美人簪流水絃琴外高風何處尋

秋日留別友人

烽煙猶未息游子欲何之落葉客同散秋風人遠離寒  
花開驛路征雁度江湄此去少舟楫思歸無定期

石門

巉巖如疊出雲木亦空濛洞草四時綠林花按節紅我  
家幽谷裏路與石門通終日抱琴鶴茅齋訪遠公

過清溪

人家都抱郭溪水遠通潮楊柳排村市桃花帶野橋春  
潭漁艇集茅屋酒旗飄不負客中景登樓飲一瓢

青山詩選卷三

九

送友人之河北

黃沙莽白日匹馬去怱怱一別各爲客尺書何自通河  
流分地脈邊柳亂天風向晚城隅立悲筇起塞鴻

歸棹

鷗起浪花碎晴江正泛舟帆飛山倒走灘急水迴流暑  
氣消殘夏湖光澹入秋隔窗有鄉語城郭近池州

暮春遊虛山洞

穿雲來洞口石隙露天光春意草微綠寒巖花未香風  
泉流細韻山翠滴空涼換得九仙骨燒丹訪子房

訪處士不值



蓬門饒古趣空谷動琴音墨迹滿庭集高人何處尋萬  
峰明積雪孤鳥赴寒林太息獨歸去徒深仰止心

客中宴別

名山尋已徧豪氣自飛騰以我遊方客笑君行腳僧微  
風香酒帟落日澹魚鱗醉裏一相問春來歸未能

雨後

雲捲長空淨斜陽吐晚晴川原含雨氣河漢走天聲古  
木歸鴉集荒郊野雉鳴山村農事急叱犢教兒耕

峽山禪院

萬疊亂峰遮穿雲鳥道斜不知深嶂裏猶有老僧家林

《青山詩選卷三

十

木夏初穎山桃春未花一聲清磬徹塵夢落煙霞

廢寺

空門全盛日香火徧方隅成敗一朝易炎涼世態殊草  
花開佛座苔蘚上經廚尙有高僧在參禪禮念珠

留別友人

江海各分手經年偶一還賴君理舊業爲我守家山疲  
馬嘶荒驛寒雞度曉關往來巖岫上爭及白雲閒

登滴翠巖懷友

一水周遭抱雙峰相對開徑穿巖腳過人上樹頭來山  
翠滴歌席簾花落酒杯他鄉猶有客登眺幾時回



讀謫仙集有感

半生不稱意放浪傲公侯終日一壺酒名山到處遊月  
照夜郎夜猿啼秋浦秋清溪好楊柳羌笛爲誰愁

送竹園之嶺南

一面未爲久怱怱又別離他鄉動數載此會更何時雁  
影客中少猿聲嶺外悲有書寄不得胡以慰相思

秋柳

撒手黃金盡河橋酒幔空寒砧敲落月斷雁唳西風眉  
眼嬌全減腰肢瘦愈工那堪情萬縷蕭瑟曙煙中

書少陵集後

青山詩選卷三

十一

身世悲烽火風霜上鬢絲青蓮一知已白首兩相思每  
飯不忘國窮愁都入詩浣花溪畔月長爲照吟髭

喜二子自淮南回里

遠隔長淮地羈身戎馬閒雁書飛不到羽檄幾時閒南  
北少通道舟車絕在還何期汝兄弟無恙返鄉關

重陽前一日送石村之崇州

世亂謀生急行蹤傍鼓鼙風驅江水立天壓海門低塞  
遠征鴻斷邊寒戰馬嘶明朝萸菊會相憶各東西

夜坐

消息日益惡斯人胡以生寒宵不肯曙皓月幾時明衰



鬢年將老窮巾學未成匣中舊藏劒夜夜作龍吟

山中

山中聊習靜雲水澹無心爲聽黃鸝語時來綠樹陰嵐  
光開返照花氣撲囊琴偶坐松風下清歌答遠林

秋晚遊相公墩

秋老荻花白風吹湖上飛亂峰銜夕照孤塔嵌危磯霜  
冷雁初下菱香嶼正肥月明歌斷續幾處釣船歸

哭金柳橋

巢覆各驚飛鄉關千里遠傷心雛燕返那見旅魂歸骨  
肉不相保死生何所依臨風一遙奠掩淚對斜暉

青山詩選卷二

十一

讀李參軍少白詩依韻寄懷

黃沙飛朔漠萬馬亂秋聲有客託幽谷臨風悵遠情悲  
歌來壯士揮手出奇兵夢入桐山月連峰煙樹平

古月庵訪周卿孃

修竹不遮寺寒泉幽谷鳴空林無落葉何處著秋聲有  
客似孤鶴登山訪舊盟到門惟一哭莫問亂離情

石門禪院

古刹綠陰裏人來亂石巔微風掃苔磴高坐聽巖泉密  
竹落清影池花開白蓮洞中丹竈在何處覓行仙

西山禪院



好峰排對面竹裏老僧家雀啄一園果茶香滿鵑花幽  
人來靜室閒坐讀南華妙絕靈山景斜陽幾樹遮

觀暹羅貢物

漢室車書統八荒一時重譯盡來王朱崖自昔標銅柱  
白雉爭傳獻越裳雁塞風沙連朔漠海天波浪湧蒼茫  
梯航萬里空勞頓異物難增  
楠座光

夏日過隱士居

結得茅廬好隱居山中甲子老樵漁半窗紅日遊仙夢  
一卷黃庭悟道書麥隴草深鳩喚雨蓮塘水淺鷺窺魚  
煙霞肯訂同心約十畝桑陰共荷鋤

蕉雨

青山詩選卷三

三

金井梧桐葉已凋小軒何處雨蕭蕭檐牙響滴夢初覺  
牆角風狂珠亂跳滿院蟲聲秋欲曙半窗燈影夜無聊  
聯牀有客難成寐細剝愁心話寂寥

春遊翠螺山

綠樹叢叢盡倒懸畫圖人在豔陽天雙峰側抱河流曲  
一寺高浮塔影圓野鹿雲深穿徑出山雞春暖上花眠  
簫聲吹徹巖頭月知是蓬萊第幾仙

送竹園之嶺南

瘴雨蠻煙五嶺浮征塗渺渺海天秋三千里外孤身客



十八灘前一葉舟白日猿聲啼斷岸黃沙雁塞入邊州  
羅浮但得春消息早折梅花寄隴頭

九日喜竹園自嶺南回偕登百牙山樓

午載行蹤寄粵臺黃花祇在嶺南開不圖故國逢佳節  
其向名山倒酒杯流水欲浮孤塔去遠峰爭擁九華來  
半生相聚無多日曾把茱萸插幾回

臺城

楊花亂落柳無情閱盡興亡是此城萬頃欵湖空鳥迹  
六朝古寺賸雞鳴金容月滿蓮臺像祇樹風翻貝葉聲  
見說涅槃能度劫捨身何事不長生

青山詩選卷三

十四

赤壁懷古

河山角逐鼎紛爭霸氣江東半壁橫儒將有謀終器小  
奸雄不死亦天生版圖幾換三分業游客空留兩賦名  
一片江濤奔萬馬洶洶猶作戰場聲

春暮姜雲門見訪

鳥語荒齋春寂寥故人門外駐征軻桐花香散山前雪  
溪水聲喧雨後潮千里煙塵飛戰壘五湖風月入詩瓢  
洶洶世變知何極辦得青蓑學野樵

寄桂丹盟先生

茅齋一榻老巖棲愁絕年來震鼓鼙戰壘遠屯京口外



烽煙直接洞庭西山中養晦金貂解夢裏勤王鐵馬嘶  
無限窮途家國淚臨風灑向武陵谿

感事

邊警紛紛羽檄飛天涯何處覓生機舟車已絕移糧路  
豺虎猶施當道威西粵烽煙連四塞南征兵馬老重圍  
可憐徧野哀鴻目望斷秋風奏凱歸

鼙鼓聲從江上來西風一炬萬家灰鷓鴣何處尋巢穴  
狐兔分爭出草萊招隱左思成幻想登樓王粲有餘哀  
茅檐空灑蒼生淚誰是東山濟變才

戎馬西郊又北郊義旗誰憤切同袍籌邊幾見圖成石  
青山詩選卷三

五

破虜空思血洗刀萬姓酷罹封豕慘九秋聲帶斷猿號  
中原莫使長驅入急調雄師扼虎牢

見說清流失故關貔貅直度萬重山援師早出金陵道  
禦敵何勞玉筍班義勇幾人全六合疑兵半嶺走諸蠻  
只愁塞上南飛雁未向衡陽結陣還

角聲秋徹九邊風韜略深藏虎帳中金帛屢勞招壯士  
寶刀連錫到元戎營頭日落嘶征馬戍外秋高起斷鴻  
聞道張綱曾借箸徒薪謀阻古今同

長星夜半耿遙天南北同時感播遷萬死未能離虎口  
八荒何日靖狼煙孤兒遠隔濠梁外羣盜橫行江漢邊



羌管更從空際發寒宵有客已無眠

巨艦艨艟截海門旌旗高蕩海天昏鯨鼉直挾風雷吼  
水怪都隨雪浪奔白日沙蟲迷戰陣清宵刁斗落驚魂  
漢家銅柱今猶在無復當年汗血痕

長天風急鬼車號萬井無人夜寂寥  
燐火夜從朱戶出劫灰分逐斷蓬飄  
東山未撤三城戍西海猶生九月潮  
何日六軍齊獻捷 至尊含笑賜金貂

登天臺峰時偕石村芝田

松風萬壑走驚雷鳥道盤空絕頂來  
鸞鶴遠從丹嶂下芙蓉低傍白雲開  
江迴匹練包吳楚影落千峰入酒杯  
攜得冰桃作高會眾仙清嘯集蓬萊

青山詩選卷三

六

經鳳城前明皇陵

濠梁家世起蓬蒿稼穡洪基創造勞  
天子阨從蕭寺出淮山爭擁鳳城高  
石麟風雨嘶荒草華表傾頽壓斷鼇  
千載喬陵弓劍在森森松柏暮烏號

曠觀亭

前林木葉下蕭蕭玉樹歌聲久寂寥  
傑閣千尋浮北極青山一角峙南朝  
蹤留短碣真人去劫換紅羊王氣消  
多少興亡無限恨長江都付往來潮

聽露軒舊話



洞簫記弄落花天八景分題疊錦賤風月嘯歌猶昨日  
江湖飄泊又今年映山紅樹牆頭畫繞竹清音谷口泉  
萬里羊城還有客烽煙無路覓南旋

早發剡山

雞聲度曉風寒泉響未歇策蹇過溪橋踏碎霜天月

送遠

杯酒餞旗亭片帆挂秋浦莫向嶺南行清夜猿聲苦

初夏偕子安芝田楓谷作

谷靜泉流清幽禽聲不絕攜琴坐綠陰桐花白如雪

懷竹園

青山詩選卷二

七

落木風高歲又寒天涯誰惜客衣單不知今夜屏山月  
君在嶺南何處看

晴峩別墅

山色朦朧煙樹昏槿籬茅舍野人村春來欲訪劉郎宅

一路桃花開到門

遊仙詩

有約同時赴上清梅花明月悟三生釣天豈是人間曲  
漫擬緜山子晉笙

閒杯石上爭殘局高會峰頭作勝遊已向滄桑倦來往  
關前何事跨青牛



青山詩選卷三終

青山詩選卷三

十六



